


Falta di vivienda vs. terreno pa agricultura

Con e gobierno nobo lo atende cu esaki?



E Plan di Desaroyo Espacial (ROP) di Aruba a designa terenonan specifico pa agricultura y construccion di vivienda. Pero awor cu e demanda pa terreno pa construi vivienda ta birando mas grandi, ta surgi e pregunta si e parcelanan agricola aki no por wordo miho uza como terreno di construccion. Gobierno ya pa años ta inverti subsidio den e sector primario, pero e productividad y viabilidad economico di agricultura tradicional cada bes mas ta wordo poni na duda. Agricultura na Aruba ta un necesidad economico, of mas bien un valor cultural?

Den practica, agricultura tradicional na Aruba tin dificultad pa competi na gran escala cu productonan importa mas barata.

E ministernan anterior di sector primario na varios ocasion a indica cu e futuro di produccion di cuminda Arubiano no ta den agricultura tradicional, sino mas bien den tecnologia moderno manera greenhouse y hidrocultura. No obstante, ta keda un reto pa haci e proyec-tonan aki economicamente viabel. E costonan di importacion, awa y mantencion y oranan di trabao ta haci dificil pa keda competitivo cu proveedornan di exterior.

Esaki ta trece nos n'e pregunta: kico t'e miho destino p'e terenonan aki? Mirando e espacio limita disponibel na Aruba y e demanda creciente pa vivienda, cambia terreno agricola pa terreno di construccion por ta un opcion logico. E falta di vivienda na Aruba ta aumentando y hopi famia ta buscando vivienda pagabel. Si agricultura no ta rentabel economicamente, no ta mas prudente pa destina e terreno aki pa construccion di vivienda y otro infraestructura esencial?

E gobierno nobo lo mester determina si terenonan agricola lo keda manteni of lo wordo cambia den terreno di construccion. Esaki no ta un decision facil, pasobra e ta toca interesnan ecologico, cultural y economico. Ademá, seguridad alimenticio sostenibel ta hunga un rol: **Si Aruba kier ta menos dependiente di importacion, ta logico pa mantene y fortifica e sector agricola.** Pero si esey no resulta factibel, kisas gobierno mester duna prioridad na construccion di vivienda.

E periodo nos dilanti lo muestra ki direccion Aruba ta bayendo. Lo sigui bet riba agricultura subsidia, of lo crea espacio pa mas construccion di vivienda?

Loke ta sigur, ta cu e espacio disponibel mester wordo utiliza strategicamente y cu un vision pa futuro. E decisionnan cu wordo tuma awor, lo determina e desaroyo di Aruba den e siguiente decanan.

avianca
the sky belongs to all of us

AUA
ARUBA AIRPORT AUTHORITY

Ban Colombia!

BOOK MESORA! avianca.com

Bogota

Medellin